



# GEREJA KRISTEN PROTESTAN INDONESIA (GKPI)

## Resort Sait Nihuta

(Jemaat Dr. IL. Nommensen – Jemaat Parbubu Pea)

### TATA IBADAH HARI KENAIKAN TUHAN YESUS

(Kamis, 13 Mei 2021)

---

1. Marende BE. 97:1-3, “Ingoton ma Sadarion”
2. Votum / Introitus
  - U : Di bagasan goar ni Debata Ama dohot Anak-Na Tuhan Jesus Kristus, dohot Tondi Parbadia.
  - R : Amen
  - U : Unang ho mabiar, ai ahu do parjolo Parpudi! Ahu do Siparngolu; naung mate do Ahu najolo, gabe mangolu antong ro di salelenglelengna; di Ahu do anak hinsu ni hamatean dohot banua toru! Haleluya!
  - R : *Mangendehon: “Haleluya, Haleluya, Haleluya”*
  - U : Martangiang ma hita ... Ale Tuhan Jesus mandok mauliate do hami tu Ho jala hupasangap hami goar-Mu ala nunga hundul ho di hasangapon-mi rap dohot Ama i nang Tondi i. mandok mauliate do hami tu Ho ala tongtong do diingot Ho hami jala tongtong do ditangianhon Ho hami asa hami asa unang nanggo sad ape sian hami manadingkon Ho dohot manulak asi ni rohaM. Urupi ma hami asa tongtong hudompakhon hami bohinami tu Ho asa unang lili hami mangalului hasangapon na rumar dohot hagiort ni portibi on. Urupi ma hami asa parjolo hulului hami harajaon-mu dohot hasintongan-Mu di tongatonga ni angka aleale ni portibi on. Ale Jesus, gongomi ma hami ruasMon di bagasan habadiaon dohot huaso ni hataM; asa anggiat boi hami sogot mandai habasaron i ma surgo i, rap dohot sude angka na badia sian sude partingian nang inganan pe. Amen
3. Marende BE. 510:1-2, “Silu Sosoi Ma Donganmu”
4. Epistel: Efesus 1:15-23
5. Marende BE. 416:1-2, “Tu JoloM O Debatangku”
6. Tangiang Manopoti Dosa
  - U : Tapahohom ma dirinta laho manolsoli dosanta di adopan ini Debata. Martangiang na hohom ma hita marsadasada ... Ale Debata, Amanami na di banua ginjang. Tuhan pargogo naso hatudosan jala Parholong roha. Tu Ho do hami mandok mauliate

ala ni holong ni rohaM na manongtong ro di saleleng ni lelengna. Marpamuati ma rohaM marnida sude dosanami jala sesama sude pangalaosionnami maradopon hataMi ala ini bangkobangko ini hajolmaon nami i. Asi ma rohaM di hami jala sesam a sude dosanami dohot pangalaosionnami, asa taruli hami di hangoluan na sintong jala manongtong di bagasan holong ini Jesus Kristus, Tuhannami. Amen.

Laos tabege ma bagabaga ni Debata taringot tu hasesaan ini dosanta ... "Parasi roha jala perdengganbasa do Jahowa, lambat tarrimas jala parasi roha godang. Nandang dibahen tu hita hombar tu angka dosanta, jala ndang dibaloshon tu hita ho hombar tu angka hajahaton. Songon asi ni amaama tu angka anakna asi ni roha ni Jahowa ni angka na mangkabiari Ibana" Hasangapon ma di Debata na di Ginjang!

R : Amen

7. Marende BE. 438:1, "Beta Sai Taendehon"

8. Togutogu tu ngolu na imbaru: YOHANES 3:16

*(Dung dijaha togutogu tu ngolu na imbaru i, marudut ma muse manjaha na ditoru on)*

U : Antong rap ma hita martangiang, mangido gogo tu Debata laho mangulahon na hombar tu hataNa i.

R : Ale Tuhan Debata, pargogoi ma hami mangulahon na hombar tu hataml. Amen

9. Marende BE. 476:1-2, "Ndada Ahu Guru di Ahu"

10. Manghatindanghon Haporsean

11. Boaboa Na Jempek / Tangiang Pangondianon

12. Marende BE. 99:1-2, "O Ulubalang Na Gogo"

13. Jamita: LUKAS 24:44-53

14. Marende BE. 125:4, "Marlasniroha Hita On"

15. Ayat Pelean: MATIUS 8:4

16. Ende Pelean BE. BE. 299:6, "Debata do Manggomgomi"

17. Tangiang Ale Amani

*(Molo ndang adong partohonon na manguluhon parmingguon, **rap mandok ma sude ruas di tangiang "Ale Amanami"**. Alai molo partohonan do manguluhon, hombar ma tu hasomalalan parmingguon di gareja)*

18. Doksologi: "Ai Ho do nampuna harajaon ..."

*(sude ruas mangendehon molo na manguluhon parmingguon angka partohonan)*

19. Amen – Amen – Amen

---

### ***Jamita Ari Hananaek ni Tuhan Jesus***

#### **SITINDANGI DI HAMUBAON DOHOT HAIMBARUON NI ROHA**

*Di hita saluhut ruas na hinaholongan ni Jesus,*

Jotjot do parsirangan manghorhon lungun ni roha. Godang do pamingkasi umbahen na tubu lungun ni roha uju jumpa parsirangan i. Parjolo, olo do i ala dirajumi ndang adong be parjumpangan di tingki na naeng ro. Paduahon, olo do i ala gabe panghilaan na di hapunjunan di na tininggalhon uju jumpa parsirangan. Jala godang do pe pamingkasi na asing.

*Di hita saluhut ruas na hinaholongan ni Jesus,*

Sadari on, masuk ma hita tu parningotan di hananaek ni Jesus tu surgo. Molo turpuk na nienet di bagasan sadari on ima sian buku Lukas. Alai ndang holan buku Lukas na mamaritahon hananaek ini Jesus. Isarana, tarsurat do i di buku Ulaon ni Apostel. Molo tapamanat di buku Ulaon ni Apostel, hira na longang jala songgot do roha ni angka sisean i marnida hananaek ni Jesus. Disurathon do i di Ulaon ni Apostel 1:11, "... O hamu halak Galilea, aha ma sai jongjong hamu mamerengi dampak ginjang? Anggo Jesus i, na tarhinsat sian lambungmuna tu banua ginjang i, na ro do Ibana sogot, songon na niidamuna Ibana laho dampak banua ginjang i." Lapatanna, adong do parsirangan na masa uju manaek Tuhan Jesus tu surgo. Alai, boi do dohonon taringot tu parsirangan i, ima **parsirangan na marimpola**.

*Di hita saluhut ruas na hinaholongan ni Jesus,*

Aha do lapatan ini **parsirangan na marimpola** i?. Parjolo, molo mulak hita muse manjaha Ulaon ni Apostel i, parsirangan ni Jesus dohot siseanNa patubuhon panghirimon tu na masa di ari sogot, ima haroroNa na paduahon tu portibi on. Mansai gomos do i muse didok di hata haporseaonta i, ima di ujung ni ponggol paduahon, mandok songon on: "... na manaek tu surgo, laho hundul tu siamun ini Debata Jahowa, AmaNa i, Pargogo na so hatudosan i. Disi ma Ibana paima mulak sogot tu tano on, manguhumi halak na mangolu dohot na mate". Jadi, ingkon rajumanta do hape, ia hananaek ni Jesus tu surgo marhadomuan do i tu haroroNa paduahalihon, laho paluahon ganup jolma na porsea tu Ibana.

*Di hita saluhut ruas na hinaholongan ni Jesus,*

Paduahon, **parsirangan na marimpola** marhadomuan ma tu panghirimonta di haroroNa paduahalihan i. Dison ma dipagomos tu hita aha do lapatan ni panghirimon. Dang boi sarupahononta **panghirimon** dohot **hagiot**. Marasing do na dua i. Molo **panghirimon** ima ulaon na ni ojakhon di ginjang ni haporseaon tu Debata. Jadi, panghirimon na tubu di parningotan ni ari hananaek sadari on ima angka siulahonon hombar tu haporseaonta di haroro ni Jesus na paduahalihan i.

*Di hita saluhut ruas na hinaholongan ni Jesus,*

Siulahonon di portibi on hombar tu haporseaon di haroro ni Jesus paduahalihan ima gabe sitindangiNa. Molo tabereng di bagasan turpuk sadari on, didok do di ayat 47 na ingkon siulahonon ni angka na porsea di portibi on, ima mamaritahon Goar ni Jesus. Ulaon na mamaritahon barita na uli i ingkon tarida do dibagasan parbue na polin, ima hamubaon ni roha. Marlapatan ma i, parbue ni panghirimonta di haroro ni Jesus paduahalihan ima ngolu na sai tongtong marhamubaon dohot marhaimbaruon.

*Di hita saluhut ruas na hinaholongan ni Jesus,*

Marhitehite hatorangan i, lam tangkas jala dasip ma pangantusionta taringot tu panghirimon i. Nunga pinatorang di jolo, ia hananaek ni Jesus tu sorga ingkon bahenonta do i gabe **parsirangan na marimpola**. Impola ini parsirangan i ima hagiot dohot hapateon ni roha laho mambahen hamubaon roha gabe batu parsuhi ni parngoluan siganup ari. Ingkon ungap do rohanta mangulahon hamubaon ni roha i di parngoluan siganup ari. Unang manigor hatop hita marsabas ni roha di angka naung taulahon siganup ari. Ingkon ungap do rohanta laho paimbaruhon dohot paubahon angka naung adong di hita dohot angka naung taula. Molo ndang hombar na taula i tu uhum ni Debata, gira jala sigop ma hita paubahon dohot paimbaruhon angka naung taula i.

*Di hita saluhut ruas na hinaholongan ni Jesus,*

Anggo barita na uli tu portibi on siboanonta marhitehite parningotan ari hananaek ni Jesus di ombason ima hamuabon dohot haimbaruon. Sahalak jolma na porsea di Jesus, ima halak na sigop paubahon dohot paimbaruhon roha nang ulaonna, asa anggiat hombar tu uhum dohot patik ni Debata. Parbue ni haporseaonta di haroro ni Jesus paduahalihan ima hamubaon dohot haimbaruon. Anggiat ma dipasupasu Debata hita laho manopa ngolu na marhamubaon dohot marhaimbaruon. Amen.